



Margeta Caduff, Zarcuns

La mort vegn cura che negin sa, magari tut anetg, tut nunspitgadamein. Aschia ei era la mort vegnida tier la Margeta. La notg dalla mesjamna sin la gievgia eis ella morta a casa sper siu frar Gion Giachen.

Ella era la giuvna dad els ed ei naschida ils 28 da december 1939. Pia avon strusch 72 onns han ils conjugals Battesta Caduff da Rueras e Luisia Berther da Camischolas retschiert la poppa e battegiau ella cul

num Maria Margeta. El vitget da Zarcuns eis ella stada sia entira veta ensemes cun ses geniturs e siu frar. Il bab ei morts baul ed aschia hai era giu num da luvrar e barhar. Ella ei stada ina femna luvrusa che ha buca temiu la lavour, era lavurs groppas e grevas han buca stermenau.

In temps eis ella stada a luvrar ella fabrica da ponn a Trun. Auters onns ha nossa cara defuncta luvravuella gastronomia, buca davontier, na ella era quella che leva buca sepresentar. Insumma ha la Margeta buca fatgbia ord uniuns e societads, ella era ina femna da casa ch'era il pli bugen a casa sia. Denton haveva ella grond plascher d'ir per izuns e garnedels. Siu liug preferiu era ella Gionda ella Val Strem, leu anflava ella adina entgins kilos. Empau da quei ch'ella recaltgava vendeva ella a sia clientella, mo biaras hontas izuns e garnedels ha ella schenghegiau.

Bugen luvrava nossa cara defuncta era sil funs e segidava nua ch'ei fageva basegns. Suenter tut las lavurs da casa e sil funs mavan las onzas dil fil dallas guilas vi e neu. La Margeta ha fatg bia caltschiel, quei era propri siu hobby e sia specialitat eran «zogga», sco ella numnava. «Zoccas» per ils pops e poppas entochen per tats e tattas e las empustaziuns eran fabricadas en cuort temps. Ed ils batteglis vegnevan lu aunc furni a casa. Savens era ella sin via cun siu Mercedes, sco ella numnava siu velo tut riend. Siu velo era buca in dils pli moderns, mo la Margeta haveva quitaui da siu vehichel, aschia ch'el vesa aunc oz ora sco novs

e cun quel eis ella ida biars onns da vitg tier vitg e fatg las cumissiuns. Beinsavens ha siu Mercedes carrau la defuncta cheu en baselgia ed on santeri.

Oz stuein nus purtar Tei, cara Margeta, el santeri - ruaussa en la pasch da Christus. Nus lein buca esser trets che nus havein piars Tei, nus lein selegrar che nus havein astgau haver Tei, gie che Ti vivas aunc adina denter nus, ti eis mo ida ordavon.

Rueras, schaner 2012, Tadeus Giossi